

吳文節公遺集

第七冊

吳文節公遺集

卷七

吳文節公遺集卷二十一

男養原謹編

奏議

應造軍船酌量推緩摺

奏為浙省應照滿號軍船請酌量推緩以節造費而紓
丁力恭摺

奏祈

聖鑒事竊照浙江省起運漕船一切運造錢糧均由各
屬徵收漕白等款解道支放近年以來因各屬民困官
疲未能依期徵解不敷運用歷於藩運二庫籌借湊濟
本屆起運新漕復因屬解短絀一切運費支放不敷經

臣

奏請於藩運二庫借款濟用勒限催解還款在案至浙
省幫丁素多貧乏近因百物昂貴每造一船除例給料
價銀八百兩外尚須賠貼銀八九百兩幫情竭蹶亦亟
須設法調劑臣與藩司糧道悉心籌計因思上年接閱
邸鈔湖南省湖北荆右衛旗丁程遠甘崇貴等因屯田
無收力乏造運經湖南撫臣奏請停造欽奉

上諭自道光二十八年起暫停造運十年該船應運漕
米分灑荆右沔陽二衛各幫帶運其應得京脚行月耗
贈銀米分給帶運丁船俾資津貼等因欽此欽遵在案
查浙江省漕白二十一幫共額設軍船一千一百餘隻

十年滿號成造內金衢嘉海分所核計其餘各幫係按
幫請照每屆各按額運船隻加一輪減留次存造每年
共計成造船一百一十餘隻計共需銀九萬數千兩今
擬量為變通每幫每所各請緩造一船每屆計可緩造
船二十三隻可節省造費銀一萬八千餘兩既可湊濟
別項運用支款免致起運時羅掘籌借而少造一船各
幫丁卽少賠貼銀八九百兩於疲丁亦大有裨益其緩
造各船應兌漕糧卽於本幫各船內分灑帶運應領行
月銀米隨糧攤給寔運丁船以資津貼在各船灑帶無
多不虞負重而每幫少造一船可紓丁困據署藩司汪
本銓糧儲道毓衡援案會議詳請具

奏前來臣覆核無異合無仰懇

天恩俯准將浙幫每屆應造軍船量為變通每幫每
各緩造一船以申年應造之船推入乙年成造遞相展
緩周而復始以節造費而紓丁力其緩造各船應免漕
糧卽於本幫起運各船內分灑帶運應領行月等欸隨
糧攤給寔運丁船俾資津貼所節造費銀兩藉以湊濟
運用別欸如有盈餘或無須湊濟卽令入冊報部候撥
統俟十年後丁力充裕仍行照舊成造以符定制是否
有當臣請會同閩浙總督臣劉韻珂漕運總督臣楊殿
邦恭摺具

奏伏乞

皇上聖鑒訓示謹

奏道光二十九年閏四月二十九日奏奉

硃批該部議奏欽此

會議清查歸補杜虧章程摺

奏為清查浙省各屬倉庫亟宜核寔歸補嚴杜續虧謹
酌議章程恭摺馳

奏仰祈

聖鑒事竊照浙省清查事宜前經臣等核明各屬寔在
那缺銀米倉數各數繕具清單會

奏在案伏查州縣倉庫錢糧

國帑攸關絲粒不容短絀既查出寔虧之數而不亟為

籌補則舊虧仍屬虛懸既查明致虧之由而不密為防
維則新虧尤難杜絕惟是歸補之法必須因時變通查
道光二年浙省清查概歸攤補惟時各缺尚稱完善虧
項亦不甚多分限勻攤尚易為力此次清查統計銀數
兩項多至三百九十餘萬兩體察各屬又值彫敝之時
循案派攤必難補足且各州縣以辦公支絀任意那移
雖與侵盜不同究有應得之咎現沐

聖恩寬其既往已蒙

逾格鴻慈若將那缺之款再歸通省代攤而原虧之員
轉得置身事外揆諸情理亦覺未得其平是以臣等已
將那墊三萬兩以上之前富陽縣知縣楊燦基等

奏參革職勒追此外各員均應各予處分勒限追繳其
處分之重輕限期之遠近應卽核其那數量予區分以
昭平允如各員中逸不足數卽由原任上司按成分賠
或各上司力難代完並由本省各官分成提補其應追
款內有欠在吏胥差保者尤須嚴予比追有抵以房屋
什物者亦須速為估變庶使玩法之輩無可倖逃懸抵
之銀悉歸寔在惟軍需工程一項原係奏准攤補未便
再議追賠自應專款剔除立限分攤以符奏案凡此追
賠攤補之款銀必悉數解司除穀價以外概行報撥米
必勒期採買除留南以外儘數運通務令未完者依限
清完無著者盡歸有着以期倉庫兩項漸臻充裕第思

事責清源法先杜弊與其追補於既虧之後孰若防範
於未虧之前查州縣積弊非解少徵多卽那新掩舊甚
或立欺浮抵私議流攤以正項之錢糧徇同官之情面
轉輾移交遞相接受種種弊竇其故皆由於交代不嚴
稽查不力所致自宜參酌舊例寬力奉行每遇交替則
嚴禁濫接濫交使前後任不敢瞻徇容隱核有徵存則
按數儘提儘解使上下忙不能欺飾掩那似此互為盤
查嚴行提解則存款無延留匿卽屬庫無事抽查而此
溢之虧那自可冀其永絕至于地方應用公項或例無
支給或例價不敷固不得不藉資州縣公捐用以貼補
第此積弊相仍尤宜力求撙節應減則減應裁則裁

於公用省一分捐資卽可為各屬補一分正項積少成
多亦足為補弊救偏之法溯查嘉慶二十二年間安徽
省清查章程曾議酌提優缺羨餘津貼累缺預扣各員
廉缺彌補舊虧此亦因地制宜之計現查浙省州縣各
缺優劣不相上下並無羨餘可提其養廉一項統計院
司道府州縣年額銀十一萬餘兩現有原議外攤應扣
鄞縣鎮海定海無著銀米及歸安奉化兵差經費等項
尚未扣足合之年額應扣捐款每年已逾五成若仍照
案預提辦公不免竭蹶惟今賠之數議歸本省提成今
補勢不能不取給養廉雖目前不能兼提而日後仍須
核扣應俟前項攤款稍輕隨時分別酌提備撥庶公項

不至偏廢而賠項亦可補苴矣總之理財之道首在用
人率屬之原先須潔已黜浮卽以崇寔大法斯能小廉
自當各予創懲俾知共相砥礪如該州縣有貪婪不職
及借端侵虧者各上司嚴行查參如各該府有不能表
率或徇庇屬員者由司道據寔揭報至藩司為錢糧總
滙之區有稽查倉庫之責如果出納不慎糾察不嚴卽
將藩司參處是整飭官方卽所以嚴杜虧缺於

國計寔有裨益除現在查出虧數飭令該藩司今年分
縣趕造四柱清冊總在

欽限八箇月內送部存核並分造按任追賠細冊隨後
咨部備查外謹將臣等會同酌議彌補舊欠杜絕新虧

章程條款敬繕清單恭呈

御覽所有

臣

等會議緣由是否有當理合恭摺具

奏伏乞

皇上聖鑒

訓示遵行再

臣

季之昌拜摺後即率同隨帶司員啟程

回京覆

命合併聲明謹

奏

一追補宜嚴定處分期限也查浙省倉庫兩項現已

核寔查出那墊確數自應一律趕緊追捕惟不明

立限期嚴定處分恐徒有追繳之名仍無歸補之

寔查嘉慶二十三年戶部議覆安徽清查分限追
補章程三四萬兩以上者革留摘頂今浙省已將
三萬兩以上各員奏請革職勒限半年完繳係較
安省泛嚴加緊辦理其虧墊在三萬兩以下之員
應請照原定章程五千兩以下者降二級留任限
一年全完開復五千兩以上限二年每年各繳一
半一萬兩以上限三年每年各繳三分之一二萬
兩以上限四年每年各繳四分之一俱革職留任
統限屆滿全完者准予開復逾限不完及完不足
數革任監追查產作抵不數銀兩仍勒限一年全
完免罪如仍不完照例辦理其欠項著落上司分

賠惟查應追各員內有業已升任者庶犒較厚有
丁憂告病勒休降革者設措較難情形既各有不
同追限宜量為區別應請將升任道府人員照現
任限期酌緊一半丁憂告病勒休降革人員照現
任限期酌展一半病故之員有子孫現任知縣以
上者仍照現任定限署追如係候補州縣以下等
官及故員子孫未仕者照丁憂告病人員酌展追
完免其先行降革亦照安省章程辦理以期周密
一分賠宜變通酌辦也上司分賠屬員虧空定例知
府五成藩司巡道各二成巡撫一成係按照本員
追剩未完銀米各數分別署賠浙省此次清查年

分久遠其中降革病故人員現雖於本員與家屬
名下儘數著追但日後追不足數卽查寔家產盡
絕者當亦不少若將追剩銀米概行照例分賠恐
為數過多籌措無術仍於帑項無裨應請酌量變
通於本員及家屬儘數著追完繳之外按其未完
分數提出四成由浙省捐廉酌核銀數分限歸補
其餘六成仍作十分計算照例分賠其分賠起限
日期應以本員著追無完治罪及咨報人亡產絕
文到之日為始照現擬追補章程期限辦理似此
分別酌辦庶賠數稍輕而追繳可期核寔矣
一書差欠宜嚴追尋賠也查浙省積弊花戶完納稅

糧並不自封投櫃多由書差領串追繳繳不足數
該書差等無不藉詞民欠轉輾延宕每遇交代卽
將欠數責令書差具限列冊移交後任官查其欠
繳屬寔不能不照案接收迨接收之後本任又有
書差欠繳之款卽不能兼顧前任應追之銀因之
愈積愈多漸成鉅欠現已悉數查出應責成現任
嚴行比追勒限一年繳足追不足數責令將原領
印串繳出另差覈追如無原串呈繳卽有侵用情
弊應將該書差監追抄抵治罪其欠數著落經放
與歷任情追之員各半分賠其分賠年限應請照
現擬追補期限辦理其書差欠繳倉穀亦應照前